



Selasa, 30 Januari 2024
Ogen: Kolose 3:22-23



Erkemalangen Man Tuhan



Perdalanan geluh jadi sada kesempatan guna mengevaluasi kai si enggo jadi dingan kai ateta silakoken ku lebe wari. Sabap wari ku wari kita nggeluh dingan mpekena kai si langa ras kurang sikap denga. Seh maka kai pe silakoken kita mereken nilai si mehuli man kerina kalak, geluhta berkualitas, iadepen Dibata bage pe man manusia si isekelewetta. Kususna i bas erbage dahin-dahin si lakoken kita. Henry Ford, nuratken nina 'Kualitas berarti melakukan sesuatu dengan benar saat tidak ada yang melihat.' Kuga nge ndia kita ndahiken dahin rikut pelayanen silakoken kita sedekah enda? Mpesenangken Dibata nge ntah kalak sideban sabap lit sura-suranta man bana. Gelah inilaina kita mehuli, ertanggung jabap ras sidebanna. Bagi siilakoken piga-piga kalak si ikut i bas kontestasi politik ntah pe perbahan nandangi pemilihen serayan i bas gerejanta.

Renungenta paksa enda mpersingeti kita kuga kin arusna kita ndahiken erbage dahinta, ntah e dahin utamanta i bas kantor, juma, toko ras sidebanna bage pe pelayanen-pelayanen si lakoken kita. Paulus i bas suratna man perpulungen Kolose, mereken pedahna gelah i bas kerina relasi rikut dahin siilakoken idahiken alu tutus. Alamat suratna man perbulangen-ndehara; anak ras orang tua, kenca e me man budak-tuan. Kuga budak i bas keluarga tuanna arus erdahin alu mehuli, la bo cari muka, gelah ipujiken ntah pe iapresiasi si mada dahin. Arusna me kerina dahin e ilakokenna sebage tanggungjawab sekalak sierdahin. Bage me kalak Kristen, ndahiken dahinna alu tutus dingan mehuli erkiteken erkemalangen ku Dibata. Sigejapken maka dahin e Dibata kap simerekensa. Enda me kualitas geluh sekalak si erkiniteken.